

ORATIO  
IN FUNERE  
CAROLI VII.  
ROMANORUM REGIS  
IMPERATORIS ELECTI

Habita in Pontificio Quirinali Sacello  
III. Id. Martias Anni MDCCXLV.

*AD SANCTISSIMUM D. N.*

BENEDICTUM XIV.

*PONT. OPT. MAX.*

A THOMA ANTONIO DE EMALDIS.



R O M A E

APUD JOANNEM MARIAM SALVIONI  
TYPOGR. PONTIFICIUM VATICANUM.

M. DCCXLV.

---

SUPERIORUM PERMISSU.



## BEATISSIME PATER.




*U*EM Caesarem  
*te mittente nove-*  
*ram, eundem vi-*  
*ta functum palam, & aperte de-*  
*flevi, meisque lacrymis obsecun-*  
*dare visus est frequens, & spe-*  
A 2
Etatis-

*etatisſimus Audientium confeſſus. Delituiſſet profeſſo in tenebris, atque intimo cordis mei moerore ſepulta funebris haec lamentatio; propterea quod mihi neque videre-  
tur par cenſorio ſuſtinendo iudicio, neque tanto digna Imperatore, quem laudandum, lugendumque ſuſceperam. Quoniam vero juffu tuo in publicum prodire cogitur, cuinam potius ſiſtenda, quam ti-  
bi? Etenim ſi quemadmodum in-  
quit B. Ambroſius - in obitu fide-  
lium Imperatorum, quidam fi-  
dei pudor, quaedam Eccleſiae  
verecundia eſt, & in tam im-  
matura morte piorum Princi-  
pum omnis Eccleſiae maefſior  
pul-*

pulchritudo est - *Tu Pontifex  
Maxime, qui tanto virtutum tua-  
rum splendore Romanam Eccle-  
siam exornas, eamdemque quo-  
dammodo pulchriorem efficis, ve-  
nies utique in praecipuam huius  
maestitiae partem. Etenim cer-  
tum est CAROLVM VII. ex  
Willelmi Familia semper, & quan-  
documque catholico nomini addi-  
ctissima procreatum, optime adeo  
de Apostolica Sede meritum fuis-  
se, ut nemo dubitet, quin aureis  
litteris ejus memoria sit nostris  
annalibus consignanda. Dum  
itaque piissimum hunc Caesarem,  
Te universam Ecclesiam mode-  
rante, datum nobis fuisse gaudeo,*

( V I )

*Et tam celeriter ereptum doleo,  
Sanctissimos Pedes humillime  
deosculor. Dat. pridie Kal. April.  
Anno CIO IO CC XLV.*





Itum, BEATISSIME PATER, quum edito ex hoc loco iussisti me dicere hodierna die, illud fortasse spectabas, ut quum in caeteris funeribus Oratores plerumque adhibeantur, qui inanem doloris referentes imaginem, querelas e medio sumunt, sciteque jactant, at nullo intrinsecus moerore afficiuntur, is potissimum in CAROLI VII. Romanorum Imperatoris electi morte verba faceret, qui ipsius virtutibus propius aliquanto perspectis ex animo loqueretur, concionemque ipsam veri doloris explicatione

commoveret , neminem profecto poteras idoneum magis , magisque perculsum ad haec parentalialia designare : Verum intermissa studiorum meorum consuetudo , suscepta itinera , atque aegritudines effecerunt , ut minus certe quam antea expectationi tuae , majestati hujus loci , dolori ipsi meo respondere possit Oratio . At enim vero , si tanta est vis , atque potentia summae virtutis cum maxima dignitate conjunctae , ut ipsa per se nullo verborum apparatu omnium oculorum aciem fulgore suo perstringat , si ita instituit nos , atque formavit natura , ut quum virtutem hanc ipsam labefactari , variisque , & aerumnosis fortunae casibus vexari , & concuti videamus , tunc stimuli quidam pietatis humanis praecordiis alte defixi dolorem in nobis excitent , laudem vero vel ab invitis extorqueant , non dubito profecto , quin licet incompta nimis rudisque prodeat Oratio mea , non dubito inquam , quin dum CAROLI VII. acerbissimum , eundemque inopinatum casum meminerit , aliquem maeroris sensum sit expressura : praesertim amplissima hac in Urbe , quam iterum , ac tertio invisendam sibi incolendamque duxit coram Augustissimo hoc Senatu , quem praesens , & absens quocumque in dignitatis , atque honoris gradu esset , omnibus benevolentiae , & observantiae argumentis est prosequutus , apud Beatissimam Petri Sedem , quam impense adeo venerabatur , ut quicumque



que impofterum futuri funt Caefares , ipfum aequare , fuperare certe nemo poffit . Horret enim animus fufpicari , in media hac Terrarum Orbis luce , ubi Religio , & Virtus perpetuum fibi domicilium pofuiffe videntur , extrema haec pietatis officia non tam fupremae illius Dignitati , quam virtuti , & Religioni debita haud ex animo quempiam perfolvere .

Neque vero quisquam veftrum Auditores exiftimet , me ad praeclariffimi Caefaris laudationem funebrem accedentem , ejufdem familiae , vel ditionis , vel armorum jura fufcepiffe tuenda ; Satis enim didici Reges omnes fufpicere , quorum caufae , quaecumque eae fint , fi in Belli difcrimen adducantur , perperam ni fallor , & inconfulto ab ijs propugnantur , a quibus neque armis , neque confilio juvari poffunt . Tantum enim abeft , ut ex hifce privatorum ftudiis , & contentionibus , quae paffim ignorantur , aut tamquam fomnia , & ( Italiae noftrae pace dictum fit ) deliramenta rideantur , aliquid capiat emolumenti Respublica , quin potius ipfius plerumque tranquillitas civili diffenfione turbetur . Doleamus fane , & perenni lacrymarum fonte profequamur oportet tantam Chriftiani fanguinis effufionem , emittamus ad fuperos diuturnas preces , ut *qui dominatur a mari ufque ad mare , in cujus manu funt Principatus , & Regna* - nobis tandem aliquando placatior fiat . Quapropter fi qua alicujus de  
me

me erga illum studij vestris mentibus haesit opinio , propterea quod semel iterumque missus , fuerim ab eo saepius exceptus humaniter , multisque benevolentiae argumentis ornatus discesserim , hanc quaeso deponite : quas enim communes nostrorum temporum calamitates publice in ejus Aula sum deprecatus , cur in hujus Urbis conspectu non desileam ? Neque committam profecto , ut a quibus semper abstinui dum viveret , ea nunc persequar recensendo , cum a nobis excessit : Ingenita haec illi erat animi celsitudo , ut quamvis in maxima rerum fluctuatione positus , nonnisi quæ expetenda forent , sibi duceret tribuenda , neque succensebat huic Italiae parti , si quae a Germania jure Imperij deberi sibi arbitrabatur , a media , & neutrius partis Gente non praestarentur : Tanta est , tamque ampla ejus laudandi materies , ut si laudavero , in nullius offensionem cadere pertimescam , nec vereri merito possim , quin justis rerum aestimatores aequi mihi , bonique consulere velint . Etenim id unum a vobis peto , ut liceat mihi super ejus tumulo effundere lacrymas , & quae haecenus premebam silentio , ne propter invidiam temporum opinaretur quispiam , me ideo in illius laudibus occupari , ut audientium animos eo delinimento praëjudicatos ad favendum Bavariae causae allicerem , nunc ipso jam vita functo , omnique suspicione depulsa , palam depromere : Justane autem sit , & communis bonorum

rum

rum omnium haec doloris causa, vestrum erit  
judicium.

Ac principio quidem ordinem quaeso, rationemque dicendi non expectetis ab eo, quem & abripit doloris aestus, & tanta rerum confer-  
tim sese offerentium copia circumstat, ut non minima haec me cura sollicitet, unde potissimum exordiar: Anne ab altissimo Bavarici generis sanguine? At quis vestrum ignorat Noricorum Ducum originem in ipsa sui vetustate abditam, atque retrusam, nec inferius quam ab antiquissimis Caroli Magni temporibus repetendam, inter caeteras, quae per universum Orbem summa nobilitate praefulgent, esse clarissimam, nisi vero ad peculiare CAROLI VII. decus pertinere putemus, quod tantam illi natura genuit ingenij vim, tantamque animi magnitudinem, ut quicumque amplissimus honoris gradus illo fuisset minor, nisi Regius, atque Imperatorius. An ab oris, & totius corporis dignitate, ex cujus aspectu imago quaedam ingentiae majestatis emicuit? An vero ab incomparabili suavitate, & elegantia morum, qua quidquid aut diceret, aut faceret, tanta moderatione, temperantia, & liberali quadam specie condiebat, ut ad devinciendos omnium animos, & mirabilem sui excitandum amorem, consulto a natura factus videretur? Recenseam ne armorum, equorum, aliasque palaestricas, & gymnasticas exercitationes, quibus aptissima quadam mem-  
bro-

brorum compositione , & consentanea totius corporis habitudine sic utebatur , ut si alius quispiam idem praestaret , immortale decus , vel inde consequeretur ? Num liberales artes , & pacis alumnas litteras , quas cupide fovebat , & excolebat impensius , nisi ut praedicem nullum fuisse negotium tantae difficultatis , aut molis , quod sine interprete non intelligeret , quatuorque linguis non explicaret , abolveretque , quas ita callebat , ut in Germanicam minus quam in reliquis doctus haberetur ; Italici vero sermonis usu adeo sibi indulgebat , ut Italicis quoque Musis fuerit oblectatus . Sed quid Italicas Musas commemoro ? Italos quoscunque potissimum vero aeternam hanc Urbem omnium Terrarum arcem , & principem sic adamavit , ut dulce sibi putaret , quod communis hujus Patriae pacem Imperatorio nomine numquam se perturbaturum fore putaret . At haec quae in aliis maxima fuissent , in ipso erant levissima .

Loquarne igitur de militaris artis gloria , qua summus Imperator sine dedecore carere non potest : Prognatus ex fortium Virorum Gente nihil magis gestiebat animo , quam bellicas majorum suorum laudes aemulari ; Quapropter vix pueritiam egressus sub Austriacis signis militiae tyrocinium posuit , Duce , atque Magistro magno illo , qui Turcarum fuit terror , Eugenio , qui ubi per totam illam foelicitissimam

simam expeditionem vidit inclytum Adolefcentem non solum quaecumque gregarij Militis munia sedulo obeuntem, verum etiam in Tauruni expugnatione inter prima agmina manus cum Hoste alacriter conferentem - *Video*, inquit *Filium ex me accepisse, quae Ego à Patre ejus Maximiliano didiceram* - Quoniam vero inter hujus funeris luctum postremi quoque Belli initia non sine lacrymis meminisse cogimur ( etsi enim militaris virtus per se laudanda, Ecclesia tamen mitis animo sanguinem perhorrescit ) quanta fuit in illo instaurando celeritas ? Quanta in victos clementia ? Quanta in subactas Provincias moderatio, & continentia ? At omnipotens rerum omnium arbiter Deus - *cujus Judicia imper-scrutabilia sunt* - qui non secundos praeliorum exitus, sed alias palmas aliosque triumphos a CAROLO deposcebat, effecit, ut excogitata ab ipso Belli instruendi ratio semper in irritum caderet : Quem igitur neque lacrymae amantissimae Conjugis, neque charissimorum Liberatorum gemitus, & angores retinuerant, quin in medias acies nudato ense procurreret, publica Imperij ratio, Faederatorum consilia retinuerunt. Superatus est absens, sed praesens omnino numquam; vinci aliquando potuit, cogi non potuit; praeripuit illi fortuna non victoriam, sed locum tempusque vincendi. Verum isthaec a nobis missa sunt, non in CAROLO solum, sed in quocumque Christiano Principe numquam satis superque lugenda. In-

Invitat enim me fulgidissima virtutum cohors , qua stipatus Regni gubernacula moderabatur: vocat justitia, qua Judiciorum corruptelis solemniter damnatis , jus unicuique celeriter tribuendum mandavit ; Vocat integritas , qua jussis ad concionem cujuscumque ordinis Administris palam edixit , ne strenas , & lautia extra ordinem reciperent, aliasque pravas consuetudines abolevit; assiduus in negociis tractandis labor ; mira in consultando sedulitas, in conficiendo celeritas , accuratissima in publicis impertiendis muneribus vigilantia , cum dicere consuevisset - *Reges in hac Reipublicae parte Judices esse , non Dominos* - Acerrimus ingeniorum aestimator , non primae , uti olim apud nonnullos Caesares , secundae , tertiaeve admissio- nis amicos habuit , eos dumtaxat benevolentia complexus , quos existimatione dignos censeret. Quamobrem quoscumque per Germaniam sapientes Viros invenit , vel inter Familiares , vel a consiliis adscivit , inter quos spectatissimum Praesulem gestisque muneribus tota Europa clarissimum , quem indigitasse sufficiat , advocavit , rogavit , induxit , ut ejus praestanti virtute , atque prudentia nixus , regimen auspicaretur Imperij , & universae Reipublicae componendae egregiam , & salutarem impenderet operam . Quibus exequar verbis invictam patientiam , qua miserorum preces , & querimonias audiebat humaniter , quibus eximias largitates,

gitates, & summum de omnibus benemerendi desiderium, quo amittere se putabat quidquid in aliorum non conferret emolumentum.

Neque vero fingi haec putetis, quae patient, quae nota sunt omnibus, loquor enim nostra hac qua ille vixit aetate, alloquor eos, quorum plerique illum noverunt, vel quibus est familiariter usus, loquor quae mox in publicum proferenda, non sine meo dedecore facile redarguerentur; de CAROLO enim praedicari merito poterat - *Et quae divisa beatos efficiunt, collecta tenes* - quae cum aliis quoque Regibus non diffitear ego quin possint esse communia, haec tamen illi propria, & singularia fuere, summa nempe magnanimitas, atque clementia, qua plerisque omnibus, licet in comitiis contra stetissent, lubentissime neque rogatus, pepercit, eosdemque quasi jacentes extulit, & pristinam eorum dignitatem amplificavit, incredibilis quaedam fortitudo, & strenui pectoris robur, quo inter maximos rerum super alias decidentium fluctus, tot tantasque sustinuit aerumnas, pericula, labores, itinera, acerbissimos rerum eventus, foris, Domi, ab Hostibus, ab Amicis, in corpore, in animo, in quibus, mirabile dictu, licet natura ingeniosus, vividus, & ad iracundiam proclivior esset, adeo se continuit, ut ne vultum quidem mutaret, sed composito ad majestatem ore, magnus animo, major adhuc imperio sui adversae sibi

( X V I )

sibi fortunae vim , & injuriam sic perferebat , quasi aliorum infortuniis tantummodo moveretur . Verumtamen haec una vox nonnumquam ex ipso erumpere audita est - *Summe Deus , si mihi non parcis , saltem Familiae parcas , & innocentibus liberis , quaeque justa sunt sanguini meo retribuas -*

At enim vero cujas ista vox est , quae auribus meis insonuit , qua nempe Religio me quodammodo interpellare videtur , & praeceptum sibi huc usque dicendi locum lamentari : Faceffite hinc paulisper virtutes reliquae me undique circumfidentes quasi symbolam , unaquaeque certatim ad sermonem hunc meum conferre contendatis . Fateor me vidisse omnes in ejus Imperij societatem adscitas , vos per dies , perque noctes in consilium adhibuit , vestro comitatu cinctus vel ascendebat Equum , vel Jus ex Solio dicebat , fermocinabatur , convivabatur ; verum quandoquidem nec vos latet , quam sancto in loco mihi sit differendum , & quare diem hanc sui juris facere Religio postulet , quae multa idcirco de vobis adhuc dicenda supersunt , ampla materies erunt laetioribus ingenijs ad scribendum proposita .

Ingredior jam ut videtis Auditores Religionis Sacrarium . Natus CAROLUS in Boijs , in ea scilicet Germaniae parte , quam haeretica labes venefico afflatu inficere numquam potuit , natus in ea Domo , quam eximia in  
rem



rem christianam merita, quamplurimae sacrae aedes, aut extructae, aut ditatae, amplissima & instituta, & dotata Sacerdotia maxime honestarunt, Ortus ex ea progenie cui singulares laudes a Tridentina Synodo delatae fuerunt, ex iis Parentibus, quos Germaniae Antistites contra funestissimam Suecorum irruptionem percusso inter Catholicas partes sociali foedere, Duces, & capita Bello praefecerunt, ebiberat una cum lacte memorabile illud Magni Vvillelmi effatum propagini huic ex Testamento transmissum - *Orthodoxam nempe fidem vita sibi chariorem perpetuo futuram, neque se ullius periculi denunciatione, atque adeo mortis metu ab hac Sacra Anchora divellendum, tolerabiliorem fore Patriae iacturam, ac Bojorum Ducem potius quam fidem, animam amissurum* - Est igitur haec Bavariae Septemviris, & Scripta, & quasi cum ipsis nata lex, ad quam non docti, sed facti, non instituti, sed imbuti videntur, ut non solum patriam Sedem ab omni Haeresis contagione praestent immunem, verum etiam ubicumque se dederit occasio, Catholici cultus exhibeant se assertores, & vindices. Quapropter ignorete, obsecro, si praeteream, & missa faciam quaecumque ad privatam CAROLI Religionem spectabant, nimirum sacrorum frequentiam, singularem pietatem, qua rei divinae quotidie intererat, & Eucharistico pane saepius in anno reficiebatur, jejunia non solum

B

statis

( X V I I I )

statis temporibus, sed quolibet etiam Virginis Matris pervigilio & Aulae indicta, & rigide ab ipso servata, cujus quidem cultu ita fervebat, ut nullam siceret praeterlabi diem, quin eam conceptis precibus ad calculos frequentandis quinquagies salutaret, neque magnum quidpiam aggrediebatur, quin ejusdem celeberrimum veteris, ut vocant, Oetingani oppidi simulachrum pluribus milliaribus a Monachio distitum, confecto pedibus itinere, quasi ad auspicia capienda, venerabundus inviseret. Praeteream quoque tres ad Beatorum Apostolorum Petri, & Pauli limina peregrinationes, quatuor ad Lauretanam Domum, decretas ab eodem ad aras, & Templa supplicationes, aliaque pietatis officia, nec privatim intermissa umquam, & solemniter ad exemplum splendide culta, ut ad ea, quae publicam Religionis causam propius attingunt, mea convertatur Oratio.

Laborat, ut nostis, in Germania Catholica fides cum externis, tum vero etiam domesticis Hostibus. Imminet amplissima Provinciae Turcarum Imperium, intimas partes contrariae torquent, & lacerant opiniones solemnibus Imperij foederibus suffultae, ac nixae: Externos si respicimus Hostes, duobus quae contra Turcas ejus aetate exarserunt Bellis, CAROLUS in primo pugnavit, contulit ad alterum decem, & octo Hominum millia, licet nonnulla familiae dissidia, inter ipsum, &

CAROLUM VI. jam erupissent : Sin vero domesticos, ecquis illum per se, vel per literas, vel per Legatos Catholicae Religioni tuendae umquam defuisse culpabit? Testor vos Germani omnes, qui nunc adestis, testor Caenobitas, & Religiosas Virgines, testor Episcopos, aliosque Sacrorum Administros, testor unum, & alterum Apostolicae Sedis Legatum, num propositum, oblatumve laborem recusaverit umquam, vel interposita cunctatione declinaverit, vel aegro susceperit animo?

Ne autem acervatim universa perstringens praeteriisse magis videar, quam attigisse dicendo, memorasse sufficiat, quanta contentione, & nisu octo ab hinc annis resistit in Comitij Ratisbonensibus, ne quartus Rissvicensis faederis articulus aboleretur, quo sublato, quingentae & ultra Paroeciae in Rheni Palatinatu Catholicis propediem eripiendae forent. Cum rursus in Comitij Francofordiensibus idem negotium ad trutinam revocaretur, induxerant aliqui in animum, CAROLUM Regni lenocinio movendum fore, ut in Caesareis pactis quidquam de suscepta articuli defensione minueret; Objiciebantur aliorum exempla, Sanctiones Imperij, injiciebatur electioni mora, timebant, trepidabant Catholici omnes, cum Tabellario adveniente juravit ex templo in publico confesso ejus nomine Legatus, CAROLUM nulla cupiditate, aut metu

percussum praeconceptam omnem abdicaturum potius Imperij spem., quam a sententia dimoveretur.

Vix Imperator designatus, quadraginta, & ultra Catholicorum millia, quibus Hamburgenſis Senatus publica Religionis consuetudine interdixerat, ad pristina Sacra restituit: Quam Fuldenſis ditionis partem Haeretici occupaverant, Caesareo decreto vindicavit: Catholicos Adolescentes summo loco natos, qui non sine periculo a patrijs laribus fuerant avulsi, revocavit: Pupillos, & Viduas, quae Religionis causa vexabantur, in clientelam recepit: Nutabat apud Hannoveram propagandae fidei negocium, patrocinio suo sustentavit: Respuebatur anno proxime elapso Romanum Kalendarium, tum propter incongruentes nonnumquam cum civili regula caelestium Syderum aspectus, & motus, tum vero maxime quia factus esset Romani Pontificis, pervicit tandem, ut omnium consensu in Kalendarium assumeretur Imperij, atque hoc unum, quod tanto operi Gregorij XIII. deerat, firmitatis robur, BENEDICTO cive suo Pontifice Maximo fuit adjectum: Rumor erat de Bonis Episcoporum in Saecularium censu adscribendis, non solum Romano Antistiti plures, easdemque gravissimas litteras dedit, quibus tam impium facinus reprobaret, sed etiam in totius Europae conspectu scripto, & ore testatus est, se potius

*potius in summa rerum mendicitate vivere paratissimum , & pane , ac frigida sustentaturum Augustam Domum , quam huic proposito assentiri .*

Verum enimvero parum adhuc ad Catholicae Religionis utilitatem se contulisse , putabat , nisi ejusdem quoque restituendae , ornandae , augendaeque studio flagraret . Quot enim Sacrarum Aedium extruendarum , reparandarumve curas periculosae aleae plenas in se non receperat ? Quot de Catholicorum studijs reformandis , & quam multa de Ecclesiastica disciplina redintegranda consilia non inerat ? Quos ex Haereticis ad se venientes amantissime non excepit , non adjuvit , non honestavit ? Quos suaviter non invitavit , allexit , attraxit ? adeout ( nisi meum testimonium audire vos pigeat ) mihi etiam omnium humillimo illum apud Manhemium convenienti , ubi inter quatuordecim Palatini , sui nempe generis , Orthodoxos Principes medius sedebat , in primo fere occurso hoc unum dixerit , domellicae ejus felicitati deesse , quod Duces Bepontinos eadem stirpe progenitos neque ibidem adesse , neque ad antiqua sacra rediisse videret .

Quod si tot praeclarissimis pro re Catholica gestis ejus celebratur Imperium tam brevi tempore exactum , quid facturus non erat , si diutius vixisset ? Si haec inter bellorum tumultus , quid in otio pacis ? Si haec summis un-

( X X I I )

dique circumfusus moleſtiis , quid in amica-  
rerum fortuna ? Si haec obſtrepentibus Catho-  
lici nominis Hoſtibus , quid ad ejus potentiam  
virtute aſſertam , & armis roboratam ne muſ-  
ſitantibus quidem ? Quamvis fateamur oportet ,  
eorum quamplurimos minus ipſius temporibus ,  
quam alienis inſenſos fuiſſe : Norant omnes  
CAROLUM orthodoxae fidei addiſtiſſimum ,  
tantaque erat animorum erga illum propenſio ,  
ut ne Caefari diſplicerent , minus quoque  
ejuſdem Sacris adverſarentur , vel ut place-  
rent , Catholicae Religionis commodis favere  
aliquando viderentur . Oh numquam fatis lau-  
dandam Principis pietatem : Oh numquam in-  
terituum exemplum : *erudiantur , intelligant , qui  
judicant Terram .*

Neque his fuit tantummodo finibus ejus  
Religio circumſcripta : Etenim hoc praeci-  
puum ſibi duxerat , ut Beatiffimam hanc Pe-  
tri Sedem , ejuſque Vicarium & ſolida , &  
ſpectata pietate proſequeretur . Quoniam vero  
obtemperanti mihi BEATISSIME PATER ejus  
laudandi provinciam demandaviſti , quaefo a  
Te , ut hanc mihi veniam impertias , ſi ex  
multis , quorum documenta in Apoſtolicis Scri-  
nijs aſſervantur , nonnulla de te duriuſcula  
delibavero , ne vitio mihi vertatur , & culpa ,  
quod debitis eum laudibus in hac luſtuofa ce-  
lebritate fraudaverim . Vereor autem , ne quod  
excidit verbum , non perinde intelligi poſſit ,  
atque

atque ego ipse cogitans sentio: duriuscule, inquam, aliquando secum agere visus es, ut librata inter communes Filios paterna benevolentia, discordibus eorum affectibus dubium te, mediumque ad scrupulum usque praestares. Cum Pontificius ad Comitia Legatus Januario Mense ad plures Germanorum Aulas divertisset, licet Monachio proximus, atque, ut illac progrediretur, ratio itineris propemodum postularet, inde tamen consulto declinavisse videbatur; Venit tandem Kalendis Septembribus, aliquantulum fero, cum jam universis pene suffragijs consentientibus omnis Imperij spes ad Bavarum devolveretur, illum nihilominus honorificentissime CAROLUS excepit, eximiumque dexterarum honorem detulit advenienti, licet Legatus haud gratulabundus accederet, sed ut meditata Belli consilia proposita pacis conditione sedaret, abrumperetque, licet Imperij Candidatus a nobis neque suffragia, neque pecuniae vim, neque militum copias expectaret, aut posceret. Cur recensere non possum, quae postmodum eidem Legato adjumenta praestiterint Bavari Legati, dum Caesari pacta conventa Francofurti conscribebantur, illud unum attigisse sufficiat, eorum opera factum, ut quae capita Romanae Curiae Magistratus directo vulnerabant, mitiora redderentur; at quo tempore, Deus immortalis, uno sane, eodemque, quo Pontifex palam ajebat -

*suarum partium non esse hunc potius, vel illum Caesarem petere, aut velle - cum regale Romanorum Solium jam conscendisset, quamquam BENEDICTUS neque solus, neque primus, sed dicam ne? ( sine obsecro, ne quid dissimulem ) quamquam BENEDICTUS in ipso temporis intervallo, quo & Batavi, & Angli, & Moschi, illum Romanorum Regem salutavisset, nihilo segnius nullum praetermisit CAROLUS obsequij, & observantiae officium Romanae Ecclesiae, Romano Pontifici debitum, Apostolicae autem Sedis munera qua vel recusata nonnumquam, quae dissimulata, vel neglecta fuerant, ultro testatus est publicis ad Coetus Ecclesiasticos datis litteris, & difficillimum opus quod Sacerdotium inter, & Imperium perpetua dissidia concitaverat, amica pactione composuit.*

Quae deinceps sequuta sunt, nonne principijs responderunt? Commendabat illi Pontifex Interpretes, & Administros, eorum opera, & ministerio usus est; mittebat cujuslibet nationis essent, recepit; praeferri aliquos ex suis postulabat Clientibus Caesaris in beneficiorum possessione adipiscenda, praetulit; Illum vel monebat, vel ad pacem hortabatur, lubentissime semper audivit, eidemque omnes animi latebras, & recessus aperuit. Quae cum Romae agerentur, Caesar Francofurti neque Apostolicae Cathedrae, neque Apostolico Magistro minus indulgebat: Habuit hic quamplura,



plura , eademque gravissima negocia definien-  
da , potius quam Summo Sacerdoti molestiam  
exhibeat , vel fileat , vel Pontificio permittit  
arbitrio : Confugiunt contra BENEDICTI man-  
datum ad ejus Dycaſteria Coenobitae , ejicit ,  
atque eliminat : Interdicitur Apoſtolicis Nun-  
tiis procuratio Pontificiae Jurisdictionis , ob-  
ſtat : Contendunt Magiſtratus Imperij nonnulla  
Clericorum negocia ad ipſos veteri conſuetu-  
dine deferenda , inſtrui , edocerique poſtulat ,  
ut in conſilio federet , non modo tamquam  
Apoſtolicae Sedis re , & nomine Advocatus ,  
ſed quaſi dixerim Procurator . Quae dum prae-  
dico , non ea recenſeo , quae rumor attulit ,  
aut audivi tantum , aut legi , ſed quorum ex-  
tant hic monumenta , quae hiſce oculis ego-  
met vidi , quorum pars aliqua quantumvis mi-  
nima fui ; Etenim oculatus quoque Teſtis per-  
ſpexi , tantam illum Sacerdotio reverentiam  
praeſtitiffe , ut in publici juris commentariis ,  
quae egregio , & ſpei maximae ejus filio a  
clariffimo Jureconſulto conſcribebantur , enixe  
curaverit , ne quidquam Romanae Eccleſiae  
Juribus , & ſanctitati contrarium admifceretur .

Proh Deus immortalis , quam aetate  
nunc vivimus ? Cujus iſta ſunt tempora ? Pu-  
taſne Innocentiorum II. & III. Martini , &  
Nicolai V. quibus Caefares , atque Pontifices  
ad Chriſtianae rei ſalutem , & incrementum  
mutuis invicem officiis , mutuaque benevolen-  
tia

tia contendere videbantur? Sunt tua BENEDICTE, sunt nostra: Memorabitur quidem tuus iste Pontificatus, & rerum antequam Pontifex esses, quasi in tyrocinio gestarum gloria, libris, & legibus scriptis, & maxima qua vivis parsimonia, & divina quadam virtute, qua vel amicitiae, vel cognationis charitati nihil indulgens, quocumque animi affectu intactus es, aut major; at multo gloriosius signabitur CAROLI VII. nomine: in illis communem omnium doctrinam vincis, communia Hominum desideria, ipsam quodammodo humanitatem exsuperas, in hoc vero infestissimos Romanae Ecclesiae hostes, pravas, atque perversas opiniones, quae longe lateque Catholicum Orbem circumfluunt, superasti, Apostolicae Sedis jura facta tecta servasti, restituiisti, roborasti: Illa licet maxima, licet a paucis forsitan imitanda, Pontifex tamen solus efficere potest, haec autem, nisi comitem habeat Caesaris pietatem, vix potest.

Illuxerant profecto nobis foelicissimi dies a majoribus nostris tot precibus, atque lacrymis expetiti, quibus stabilis, & certa Sacerdotij cum Imperio concordia tandiu desiderata apparere jam videbatur, bonique omnes Ecclesiae Catholicae gratulabantur, advenisse Caesarem, cujus opera insperatum hoc ingens Bonum non obtineri solum, sed permanere diu potuisset; Verum hunc nobis Caesarem importuna mors sustulit: Vix illum superi ostenderant, quum

quum subito rapuerunt. Ipse quidem mortem illam, quam saepe in media acie contempserat, Christiana virtute fretus non horruit, sed invicto eodem animo, quo tot adversa pertulerat, Liberis in pientissimae Matris cura relictis, venia ab omnibus palam petita, etiam ab Hostibus, ( quibus non odio ductus, sed familiae charitate, & consulentium stimulis bellum se indixisse testatus est ) coeterisque rebus, quae ad brevi morituros pertinent, sancte compositis, mortem inquam immaturam, inopinatam, acerbam, placide, sapienterque oppetiit. Ad cuius pulcherrimae non dicam amplius mortis, sed migrationis, commutationisque vitae laudem praeterire nequaquam possum, quod unctus ad extremum cum ageret animam, hoc solatij, antequam supremum clauderet diem, unice sibi deesse affirmaverit, quod juvenilis aetatis errata in conspectu omnium deprecari per se nequiret, atque a subiectis Populis, ut sibi ignoscerent, exorare, si quas illis offensiones, & malorum irritamenta obtulisset; Quamobrem effusus in lacrymas obsecravit a Filio, ut sacri Concionatores per universam Bavariam hoc deprecationis officio, perinde ac si vivus ipse, & praesens adesset, suo nomine e pulpitis fungerentur: quemadmodum postea factum fuisse comperimus. Equidem tibi gratulor Augustissime Caesar, quod de saevo tempestatis aestu, & mediis flucti-

fluctibus in portum, atque de flebili Hospitio ad plenam hilaritatis caelestem domum te receperis; non est enim cur dubitem, quin beata immortalitas sospitem te, incolumemque exceperit: Vixisti satis, si non ad communis naturae cursum, & secundam rerum fortunam, vixisti satis ad virtutem, & gloriam sempiternam. Quantum mors vitae, fortuna foelicitati detraxit, tantum addidit Sapientiae, tantum aeterno, ut meus mihi auguratur animus, praemio pietatis. Facit autem ut ita sperem Christianissima vivendi ratio, quam cum Sanctissima Coniuge, quibuscumque amotis impedimentis religiose servasti, dum ad Imperij gubernacula sederes; facit Christianum robur, quo tantas hausisti calamitates; facit singularis cultus, quem orthodoxae Fidei, & Sedi Apostolicae praestitisti. Neque enim sine Divini Numinis voluntate evenerat, ut tanto pacis, & patriae studio nuper esses incensus, patria potiebaris quidem, sed ita demum, ut non aliquis rursus emigrandi metus accederet: Veneras in aliquam pacis spem, sed incertam hactenus, longam, aleae, & salebrarum plenam; Utrumque desiderium misericors, & mitissimus magno cum foenore explevit Deus, tibi que limen aeternitatis ingredientī, duo clarissima tui nominis lumina Henricum, & Cune-gundem caelestium syderum incolas obviam arbitror prodiisse dicentes, huc propera, haec est

est Patria , haec est Pax , haec Corona tuis virtutibus debita .

Nobis quidem in maxima rerum vicissitudine , atque trepidatione relictis , nova haec aliarum cumulo causa doloris , & luctus accessit , quandoquidem dum tota perstrepat armis , & belli facibus ardet Europa , alia haec super alia discordiae semina inter dissidentes animos digladiantesque sunt iacta . Quid igitur restat ad nostri maeroris solatium , nisi & piis CAROLI Manibus sacro ritu iusta persolvere , ut si quae adhuc illi expiandae sint maculae , CHRISTI SANGUINE detergantur , & DEUM OPTIMUM MAXIMUM magnis precibus obtestari , ut quae ventura jam sunt , fauste adeo foeliciterque contingant , ut eorum , quae CAROLI VII. interitu praeterierunt , memoria , atque recordatione minus doleamus . Dixi .



